



## PRESS RELEASE

18 Ianuari 2023

### OTO'OTOGA O LE TALA I LE TAMAOAIGA O SAMOA I LE ULUA'I FA(4) MASINA O LE TAUSAGA FAALETUPE 2022/2023 E FAAGATA MAI IA OKETOPA 2022

#### **A. TAMAOAIGA O SAMOA**

1. E le o toe po se silafia i mea sa tutupu ma o loo tutupu i le lalolagi i tulaga o le faama'i o le Koviti-19, lea na mafua ai vavao ma tapu o femalagaiga, ae le gata i lea o taua i le va o nisi atunuu o le lalolagi o loo maua mai ai le suauu ma isi oloa. O aafiaga nei i le tamaoaiga o le lalolagi ua faapena ona sosolo mai ai i lo tatou lotoifale, ona o le fesootaiga (interconnectedness) o le tamaoaiga o Samoa i le tamaoaiga o le lalolagi, lea e faalagolago tele i fefaatauiga o oloa ma auaunaga ma tagata (trade and tourism).
2. I faamaumauga lata mai o le **fua faatatau o le tamaoaiga (GDP)**, o le aofaiga o oloa gaosi ma auaunaga faatinoina i totonu o le atunuu mo le **12 masina faamuta mai ia Setema 2022**, ua faamauina lea e **SAT\$1.88 piliona** (real GDP SAT\$1.88 piliona). O se **pa'u e tusa ma le -4.2 pasene** mo le 12 masina e faagata mai ia Setema 2022 pe a faatusa lea i le 12 masina e faagata mai ia Setema 2021.
3. O le tolu ai lea o tausaga soso'o o faamauina le pa'u o le tamaoaiga, amata mai i le 2019/2020 lea na pa'u ai i le -3.1 pasene, sosoo mai ai i le 2020/2021 lea sa pa'u ai i le -7.1 pasene ma le tausaga faale-tupe na te'a nei 2021/2022, lea na faamauina ai le pa'u e -6.0 pasene.
4. O le mafuaaga o leni faaletonu faaumiumi i le tamaoaiga o Samoa na amata mai i le faama'i misela ia Tesema 2019 ona sosoo mai ai lea o le tapunia o femalagaiga ona o le pui-puiga o Samoa mai le faama'i o le Koviti-19 ma ia ia Mati 2020 seia oo atu ia Iuni 2022.
5. Ae peitai, o faamaumauga lata mai mo le kuata o Setema 2022, ua faamauina le siitia o le fua faatatau o le tamaoaiga i le 4.7 pasene, o se faailoga ua amata ona toe tapu'e ma toe agai ina faaleleia le tamaoaiga o Samoa.
6. I tulaga i **tupe faamomoli poo remittances**, sa faamauina i le uluai **fa masina o leni tausaga faale-tupe 2022/2023**, le siitia o tupe faamomoli i le **23.1 pasene i le \$287.15 miliona**, pe a faatusa atu i le fa masina o le 2019/20 (\$233.35 miliona). O

le tele o nei tupe faamomoli e auala mai lava i aiga i Samoa nei aemaise lava le tele o tupe ua lafo mai mo faalavelave faleaiga.

7. I tatou fefa'atauaiga ma atunuu i fafo i le **fa masina faamuta mai ia Oketopa 2022** o lenei tausaga faaletupe 2022/2023, pe a faatusa atu i le taimi lava lea e tasi i le tausaga ua mavae 2021/2022;
  - i. Sa faamauina ai le siitia malosi e **107.3 pasene i oloa o loo auina atu i fafo (exports)** i le tau aofa'i e tusa ma le SAT\$43.18 miliona (ona ua faamauina le siitia o le i'a ma le suau'u popo auina atu i fafo);
  - ii. Sa faamauina foi le siitia o tupe totogi mo **oloa faatauina mai fafo (imports)** i le **56.4 pasene** i le tau aofa'i e tusa ma le SAT\$419.96 miliona;
8. Sa faapea foi ona siitia le aofaiga o tagata ma aiga asiasi mai fafo (**visitor arrivals**) talu ona toe tatalaina femalagaina ia Aukuso 2022. I le uluai tolu masina o lenei tausaga faale-tupe faamuta mai ia Setema 2022, e 14,358 le aofai o i latou na asiasi mai i Samoa.
9. I le tulaga o le **fua faatatau o tau o oloa ma auunaga (inflation rate)**, sa siitia i le **11.3 pasene i le faaiuga o Novema 2022**, ma ua matua sili atu ma le alafua faatatau e 3.0 pasene. O le maualuga ua iai nei le fua faatatau o tau o oloa, ona o le siitia o tau o auunaga ma oloa o loo gaosi i fafo, o tulaga le mautonu o fela'uaiga o oloa i luga o vaa ma fefa'atauaiga, faatasi ai ma aafiaga o le taua i Russia-Ukraine i luga o le tau o le penisini ma le kesi, ua faapena ona maualuga ai tau o oloa faatauina mai fafo (imports). O lona uiga o tau o oloa mai fafo o loo unaia le maualuga o le fua faatatau o le tau o oloa ma auunaga i totonu o le atunuu.
10. O le aofai o **tupe faaleoleo/fa'aagaga mo fefa'atauaiga** i le faaiuga o **Oketopa 2022** o loo famauina i le **\$785 miliona**, o loo mafai ona faatauina mai ai oloa mai fafo mo se vaitaimi e tusa ma le **9.0 masina**. O le mafuaaga o le siitia o tupe faaleoleo ona o le tele o fesoasoani mai i tatou development partners, auā le faatupeina o le puipuiga o Samoa mai i le faama'i aemaise le lagolago i le Tala o le Tupe a Samoa.

#### **E. VA'AIGA ALUALU MAMAO MO LE TAMAOAIGA**

11. O le toe tatalaina o femalaga'iga faa-va-malo ia Aukuso 2022, ua fesoasoani tele lea i le toe unaia o le tamaoaiga. O loo iai se vaaiga alualu mamao (forecast) o le a siitia le fua faatatau moni o le tamaoaiga (Real GDP) i le va o le 2 -3 pasene i le tausaga faale-tupe lenei 2022/2023. E faavae lea vaaiga alualu mamao i le tulaga malosi ua iai le tamaoaiga i le kuata o Setema 2022 faatasi ai ma le faatupula'ia o le numera o tagata ma aiga asiasi mai i Samoa ia Tesema 2022.
12. I le tulaga i le fua faatatau o tau o oloa ma auunaga (inflation), o loo fuafua e pa'u i le 11.0 pasene i le faaiuga o Iuni 2023, ma faapena ona faaauau ai le aga'i mai i lalo o le inflation i masina i tua atu. Peitai, o loo faamalumalu mai pea aafiaga o le taua a

Russia ma Ukraine, i luga o fela'uaiga o oloa faapea le tau o le penisini, pe a faaauau pea lenei taua i se taimi umi. O nei aafiaga e ono toe alu ai i luga le inflation.

13. O loo iai se vaaiga alualu mamao o le siitia o tupe maua mai oloa auina atu i fafo (exports), tupe faamomoli (remittances), tupe maua mai tagata asiasi mai fafo (visitor earnings) faapea foi fesoasoani mai atunuu i fafo. O se fesoasoani tele lea i le faatumauina pea o le tulaga malosi o loo iai tatou tupe faaagaga mo fefaatauaiga ma i fafo (foreign reserves). Peitai, o loo tele lava foi le lē mautonu ona o aafiaga mai fafo e ona tuta'ia ai le agai i luma o le tamaoaiga, ma e tatau ai ona faasoa lelei le faaogaina o tatou tupe faaleoleo o iai nei. Ia ma le isi, o loo fuafua foi e siitia tupe fa'aalu i le faatauina mai o oloa mai fafo (imports) ao faagasolo galuega ma atina'e mo le toe tapu'eina ma le faaleleia o le tamaoaiga.

**FALETUPE TUTOTONU O SAMOA**  
**18 IANUARI 2023**